



SUD BiH Izrečena presuda za međunarodni šverc heroina i skanka

Ali Lokaj osuđen na sedam godina robije

Od jula do decembra prošle godine rukovodio grupom koja je sa područja Kosova, Makedonije i Srbije švercovala drogu u BiH, te iz BiH u Srbiju

M.M.

Sud BiH izrekao je jučer presudu kojom je Ali Lokaj osuđen na sedam godina zatvora zbog toga što je oganizovao i rukovodio organizovanom kriminalnom grupom koja se bavila međunarodnim švercom heroina i skanka.

Priznao krivicu

Istom presudom, za još devet mjeseci mu je produžena mjera pritvora u kojem se nalazi od 11. decembra prošle godine, kada je ova grupa pala u akciji „Oskar“, koju su izveli pripadnici SIPA-e. U kaznu će mu biti uračunato i vrijeme koje je dosad proveo iza rešetaka.

Također, Sud je optuženom oduzeo 969 grama heroina, devet mobitela sa pripadajućim karticama, digitalne vage i ostale predmete korištene prilikom vaganja i prepakivanja droge. Lokaj se obavezuje i da namiri troškove postupka, o čijem iznosu će Sud donijeti naknadno rješenje.

Presuda je izrečena nakon što je Lokaj na prošlom ročištu, održanom 26. novembra, priznao krivicu.

U presudi koju je izrekla predsjedavajuća Sudskog vijeća sutkinja Tatjana Kosović navodi se da je Lokaj organizirao i rukovodio grupom za organizirani kriminal, kojoj su kao članovi pristupili Nijazi Muharemi, Agim Eljšani, Vidak Milić, Hakija Mehović, Nermin Planinčić i Vahidin Dobrača. Grupa se od jula do polovine decembra 2014. godine bavila neovlaštenom međuna-

rodnom kupoprodajom, prenosom, prevozom, držanjem, posredovanjem u daljoj prodaji, uvozom, izvozom, slanjem i isporukom heroina i skanka sa područja Makedonije, Srbije i Kosova u BiH, te sa područja BiH u Srbiju. Drogu su u BiH miješali sa određenim supstancama radi povećanja njene mase, te je dalje prodavali njima poznatim osobama u BiH i Srbiji.

Lokaj je tako od sredine do kraja jula 2014. godine organizovao nabavku heroina mase od 0,5 do jednog kilograma i najmanje kilogram i po skanka na području Kosova, koja je zatim prebačena u Sarajevo. Drogu su držali u iznajmljenim stanovima u naselju Tibra na Stupu. Drogu su tu pomiješali sa određenim supstancama, a zatim jedan dio prevezli u Bihać. Drugi dio je u nekoliko navrata, nakon dogovora sa izvjesnim Adom iz Novog Pazara prebačen preko ilegalnih prelaza na Zvorničkom jezeru i na području Bijeljine preko rijeke Drine u Srbiju. Pripadnici MUP-a Srbije u dva navrata su drogu oduzeli na području Loznice, odnosno Šapca. Utvrđeno je i da je Lokaj u novembru 2014. godine, ponovo u dogovoru s istim kupcem iz Novog Pazara, drogu poslao autobusom. Dio droge zaplijenio je MUP Tuzlanskog kantona, dok je jedan dio prevezen i prodat u Livnu.

Obrazloženje presude

Obrazlažući presudu, sutkinja Kosović je kazala da je Sud prihvatio Lokajevo priznanje krivice, ali i da je na osnovu

dokaza nesporno utvrđeno da je Lokaj organizovao i rukovodio ovom grupom. Međunarodni element ovog krivičnog djela utvrđen je na osnovu presretnutih telefonskih razgovora.

Sud je imao u vidu olakšavajuće okolnosti na strani optuženog, te mu je kazna od 10 godina zatvora, koja je inače zapriječena za ovu vrstu krivičnog djela ublažena. Tome je, naglasila je sutkinja Kosović, pored priznanja krivice, doprinijela i njegova ranija neosuđivanost, kao i to da je od početka želio da sklopi sporazum s Tužilaštvom, da je porodičan čovjek, te da je izrazio kajanje.

Jučerašnjem izricanju presude nisu prisustvovali ni optuženi Ali Lokaj, ni njegov branilac Omar Mehmedbašić.

PRESUDE OSTALIM ČLANOVIMA

Svi se nagodili sa tužiocem

Nekad suoptuženi Agim Eljšani, zvani Gim (1963), rođen na Kosovu, a nastanjen u Bihaću, Vidak Milić, zvani Zec (1950) i Vahidin Dobrača (1986) presudama Suda BiH, nakon nagodbi, još ranije su osuđeni na po godinu zatvora, dok je Hakiji Mehoviću (1961) izrečena kazna od dvije godine i pet mjeseci. Prethodno su Nijazi Muharemi, zvani Tiki Kiki (1963), rođen u Tetovu, te Nermin Planinčić (1976) i njihovi branioci Muhidin Kapo i Senad Dupovac sklopili sporazume o priznanju krivice sa državnim Tužilaštvom, te im je Sud izrekao kazne od po godinu i šest mjeseci robije.

Page: 26

Reach: 0

Country: BOSNIA AND HERZEGOVINA

Size: 479 cm2

2 / 2



Uhapšen u akciji Oskar u decembru prošle godine